

Inuussutissarsiorneq piginnaasallu ineriartortinnissaat pillugit Namminersornerullutik Oqartussat nalunaarutaat

Inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit Inatsisartut peqqussutaat nr. 2, 31. maj 1999-imeersoq, § 7, imm. 2 aamma § 49 naapertorlugit aalajangersarneqarpoq:

Siunnersuisoqatigiit siunertaat suliassaallu

§ 1. Naalakkersuisut inuussutissarsiutinik ilinniartitaanermi piginnaasat ineriartortinnissaat pillugit Naalakkersuisunut siunnersuisussanik pilersitsisapput, suliffeqarnermi inuussutissarsiutinullu ilinniartitaanermi suliassa qarfiit ineriartortinneqarnissaat siunertaralugu, aammalu inuussutissarsiutini ineriartortitsineq, suliffeqarnermi ineriartortitsineq inuussutissarsiutinullu ilinniartitaanerup iluani ineriartortitsinermi suliniutit ata qatigiissaarneqarsinnaaqqullugit.

Imm. 2. Siunnersuisoqatigiit inassuteqaateqartassapput suliassani Naalakkersuisunit saqqummiunneqartuni. Siunnersuisoqatigiit nammineerlutik suliassani suliassa qarfimminnut attuumassuteqartutut isigisaminni suliqaarsinnaapput.

Imm. 3. Siunnersuisoqatigiit inassuteqarnerminni tikkuaasinnaapput pissutsinut atuuttunut misissueqqissaarnissamik takussutissiortitsinissamillu pisariaqartitsiviusuni, tamatumunnga ilanngullugit ajornartorsiutit piffinni ataasiakkaani nunallu immikkoortuini pisut.

Imm. 4. Siunnersuisoqatigiit ukiumoortumik kingusinnerpaamillu 1. april Naalakkersuisunut suliniutitik pillugu aammalu suliassa qarfimi iluani ineriartorneq pillugu nalunaaruteqartassapput.

§ 2. Siunnersuisoqatigiit sulinerminni:

- 1) Ingerlatseqataassapput ata qatigiissaareqataallutillu, suliffeqarnermi illuatungeriit akornanni, inuussutissarsiornerup, suliffeqarnerup inuussutissarsiutinullu ilinniartitaanerup suliniuteqarfigineqarnerani.
- 2) Inuussutissarsiornerup uummaarissup pilersinneqarnissaata ineriartortitsinikkullu suliffeqarnerup eqaatsumik ingerlasuunissaasa aqqutissiuunneqarnissaat anguniassavaat, aammalu inuussutissarsiutinik ilinniartitaanerup immikkuullarissamik nalinginnaasumillu piginnaasanik ineriartortitsinermik eqqanaarisup pilersinneqarnissaa aqqutissiutissallugu.
- 3) Suliffeqarnermi ilinniartitaanermilu piffissami sivikitsumi atuuttussanik siunissarlu ungasinnerusoq eqqarsaatigalugu piginnaasanik ineriartortitsinissamik pisariaqartitsinerup aaqqiivigineqarnissaa anguniassavaat, tassungalu ilanngullugit piginnaasat ineriartortinnissaanni tullerijaa rinissamut siunnersuuteqartassallutik.
- 4) Suliniutinik inatsisiliornikkullu ilusilersuinernik siunnersuusiortassapput, taakku aqqutigalugit sulianik ingerlatsinermi illuatungeriit pisortallu piginnaasat ineriartortinneqarnissaannut pisariaqartitsiffiusuni

aningsaleeqataannissaannik kajumilersinneqallugit.

5) Siunnersuinerminni inuuneq naallugu ilinniarnermik oqartarnerup naleqquttumik pilersitsinikkut imaqartinneqarnissaa anguniassavaat.

6) Nunami tamarmi inuussutissarsiornikkut ineriartortitsineq, inuussutissarsiutinik ilinniartitaanermi suliffeqarnermilu suliniutit malittarissavaat, aammalu inuussutissarsiutit ineriartortinneqarneranni killiliussassanik aqutissiuussisassallutik, suliffeqarnerup inuussutissarsiutinullu ilinniartitaanernut eqaatsumik iluseqartinneqarnissaa aqutissiuutissallugu, sulisullu piginnaasaannik ineriartortitsinissaata eqqanaarneqarnissaa peqataaffigissallugu.

7) Inuussutissarsiutinik ilinniartitaanerup ineriartortinneqarnera malittarissavaat, ilinniartitaanerillu pitsaassusaat, ineriartortinneqarnerat, naleqqussarsinnaassuseqarnerat ilinniakkallu ataasiakkaat immikkoortuini ataqatigiissaarineq pillugu innersuussisassallutik.

8) Ilinniartitseqqittarnerni piginnaasallu ineriartortinnissaa inuussutissarsiornikkullu ineriartortitsineq pillugu pilersinneqartut ilusilersorneqarsimanerisa nakkutigineqarnerat peqataaffigissavaat siunnersuiffigissassallugulu.

9) Ineriartortitsineq pilersitsiortornerlu pillugit siuarsaataasinnaasut aaqqiissutit ilaatinneqarnissaa isumagissavaat, suliniutinik ilinniartitaanermi aammalu suliffeqarnermi inuussutissarsiutinillu siuarsaanermut attuumassuteqartuni.

10) Sumiiffinni ataasiakkaani, nunallu immikkoortuini attuumassuteqartut peqatigallugit, inuussutissarsiornarup ineriartortinneqarnerani, suliffeqarnermi aammalu inuussutissarsiutinut ilinniartitaanermi suliniutit aaqqissuunneqarnerannut siunnersuuteqartassapput, aammalu piffinni ataasiakkaani nunallu immikkoortuini suliniutit nuna tamakkerlugu suliniutinut tulluarsarneqarnerat peqataaffigissallugu.

Siunnersuisoqatigiit inuttalersugaanerat inissitsiternerallu

§ 3. Siunnersuisoqatigiit ilaasortaqarput siulittaasumik Naalakkersuisunit toqqarneqartumik aammalu matuma kinguliani taaneqartunit kattuffinnit pisortaqarfinniillu sinniisumik kingoraartissamillu toqqarneqartunik:

1) NUSUKA.

2) Sulisitsisut peqatigiiffiat (GA).

3) ILIK.

4) Sulinermik Inuutissarsiuteqartut Katuffiat (SIK).

5) KANUKOKA (Ikaarsaariarnermut ataatsimiititaliat 1. maj 2008 pilersinneqarnissaasa tungaannut, tamatuma kingorna kommunit sisamaasut tamarmik sinniisaannik).

6) Sanaartornermik Ilinniarfimmi forständerit, kiisalu ilinniarfiit teknikimik ingerlatsiffusut sinnerlugit Saviminilerinermik Ilinniarfik.

7) Inuussutissalerinermik ilinniarfiit sinnerlugit ATI-p aamma INUILI-p forständerii.

8) Niuernermik, kiffartuussinermik, aqutsinermik IT-millu ingerlatsiffiit sinnerlugit Niuernermik Ilinniarfii forständerii.

9) Takornariaqarnermut Inuussutissarsiornermullu siunnersuisoqatigiit.

10) Teknikikkut siunnersuisartut peqatigiiffiat.

Imm. 2. Immikkoortoq 1-mi pineqartut ilaasortat saniatigut Inuussutissarsiornermut Naalakkersuisoq pisinnaatitaavoq ilaasortamik siunnersuisoqatigiit suliaannut attuumassuteqartunik ilisimasaqartumik

toqqaanissaminut.

Imm. 3. Ilaasortat imm. 1, nr. 6-8-mi pineqartut brancheudvalgiini siulittaasut imaluunniit ilinniarfit forstanderiisa akornannit toqqarneqartassapput.

Imm. 4. Siunnersuisoqatigiinni ilaasortat toqqarneqatassapput qinigaaffimmut ukiunik sisamanik sivilissuseqartumut.

Imm. 5. Siunnersuisoqatigiit akunnerminni siulittaasumut tulliusussamik toqqaasassapput.

Siunnersuisoqatigiit siulittaasuata peqanngiffini siulittaasup tulliata ataatsimiinneq aquttassavaa.

Imm. 6. Siunnersuisoqatigiit suliassaqaqfinnit ukunannga ataatsimeeqataasartumik ilaqartinneqassapput:

- 1) Aningaasarsiornermik ingerlatsiviit.
- 2) Kalaallit Nunaanni takornariaqarnermi inuussutissarsiornermilu siunnersuisoqatigiit.
- 3) Greenland Venture.
- 4) Kalaallit Nunaanni naatsorsueqqissaartarfik.
- 5) Inuussutissarsiornermut, Suliffeqarnermut Inuussutissarsiuutinullu Ilinniartitaanermut Naalakkersuisoqarfik.

Imm. 7. Siunnersuisoqatigiit imm. 6-imi taaneqartut ataatsimeeqataasartut saniatigut ataatsimeeqataasartussanik toqqaasinnaapput, ataatsimiinnermi immikkut oqaluuserineqartunut ilisimasalinnik.

Ataatsimiinnerit

§ 4. Siunnersuisoqatigiit ukiumut minnerpaamik sisamariarlutik ataatsimiittassapput.

Imm. 2. Siunnersuisoqatigiit immikkut ittumik ataatsimiittassapput;

- 1) Naalakkersuisut piumasarippassuk,
- 2) siulittaasup pisariaqartippagu, imaluunniit
- 3) ilaasortat amerlanerussuteqartut siunnersuutigippassuk.

Suleriaasissaq

§ 5. Naalakkersuisut siunnersuisoqatigiit suleriaasissaat aalajangersassavaat.

Allattoqarfik

§ 6. Inuussutissarsiornermut, Suliffeqarnermut Inuussutissarsiuutinullu ilinniartitaanermut Naalakkersuisoqarfiup siunnersuisoqatigiit allaffissornikkut sullinneqarnerat isumagissavaat.

Aningaasalersorneqarnera

§ 7. Siunnersuisoqatigiinnut ilaasortaaneq akissarsiaqarfunngilaq. Siunnersuisoqatigiit suliaannut aningaasartuutit Inuussutissarsiornermut, Suliffeqarnermut Inuussutissarsiuutinullu Ilinniartitaanermut Pisortaqaqfimmitt akilerneqartassapput. Kisiannili angalanernut najugaqarnernullu aningaasartuutit ilaasortanik ataatsimeeqataasartunillu toqqaasimasut aningaasartuutigisassavaat, Naalakkersuisut immikkut ittumik ataatsimiittoqarnissanik piumasaqaateqarsimanngippata.

Atortuulersitsineramik atorunnaarsitsinermillu aalajangersakkat

§ 8. Nalunaarut 1. maj 2008-mi atuutilersinneqarpoq.

Imm. 2. Ilutigitillugulu Namminersornerullutik Oqartussat nalunaarutaat Piginnaasat pillugit

siunnersuisoqatigiit pillugit nr. 3, 8. marts 2007-imeersoq atorunnaarsinneqarpoq.

Namminersornerullutik Oqartussat, ulloq 15. april 2008

Siverth K. Heilmann

/

Bent A. Sørensen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut